

摘藻堂四庫全書薈要

史部

欽定四庫全書叢要

史部

硃批諭旨卷二百十四之四

詳校官編修臣繆晉

欽定四庫全書薈要卷八千二百三

史部

硃批諭旨卷二百十四之四

硃批郝玉麟奏摺

雍正八年十一月初二日廣東總督臣郝玉麟謹

奏為微臣戀

主情殷恭請

陞見用伸積愆事竊臣樗櫟庸材至愚極陋重沐

殊恩鏤刻難報上年臣於提督任內具摺奏請

陞見欽奉

硃批命臣速赴廣東總督新任到任料理一二年周悉地方情形之後再來面朕亦不為遲欽此欽遵今計臣到任以來已經一載有餘仰賴

皇上洪福比年收成豐稔現今米糧價值甚平凡海洋大盜山林匪類頗知斂跡惟是廣東地方山海交錯習氣相沿臣職任重大知識淺短必得跪聆

聖訓俾臣有所遵循況臣受

恩深重未獲一覲

天顏臣犬馬之私何能自己伏乞

皇上鑒臣愚忱

允臣所請准予

陞見臣即欽遵輕騎赴京叩仰

天顏跪聆

聖訓俾微臣依戀之誠得以稍慰而一切吏治民生之

事亦得面請

訓旨遵奉措施臣無任懇切待

命之至伏乞

睿鑒批示遵行謹

奏

粵東諸務尚多未經就理路途遙遠且不必來京但能效法鄂爾泰之居心行事勝如來京見朕也

同日又

奏為奏明事竊照前者逆賊曾靜狂悖無知仰蒙

皇上如天之仁格外寬宥

欽頒諭旨昭示中外俾令愚蒙之輩共曉然於大義臣

欽遵

聖旨通行刊刻頒發在案茲廣東修輯通志經布政使
王士俊聘請浙江告養庶吉士魯曾煜董理其事
據魯曾煜以所定志書稿就正於臣并向臣云諭
旨內張熙口供有屈溫山集議論無不與逆書相
合之語現修廣東志書纂輯從前文集有屈翁山

其人恐即屈溫山等語臣正在密加察究間據逆賊屈翁山之子屈明洪現任惠來縣教諭赴廣州潮州二府出首伊故父翁山文外詩外等書語多悖逆投監認罪等情由布政使王士俊等詳報前來除會疏

題叅外事關逆賊私著逆書理合恭摺具奏伏乞

睿鑒謹

奏

知道了曾靜既寬此亦當寬宥者

雍正八年十二月初二日廣東總督臣郝玉麟謹

奏為敬陳愚悃仰祈

睿鑒事竊臣於本年十一月二十日接讀邸鈔知有滇
省烏夷叛逆一事變起倉卒以致傷殘文武兵民
臣實痛心切齒憤恨無極今督臣鄂爾泰既調三
省官兵進剿諒茲釜底遊魂自當尅期而定臣愚

陋淺識何敢越職妄瀆但臣在滇年久夷獮之情

狀頗為熟悉凡有所知敢不冒陳愚悃伏查烏逆

所恃惟在凉山大兵到日烏逆一經破敗必以凉

山為竄匿之所倘凉賊拒而不納或擒而出獻事

屬易結否則進勦機宜尤須斟酌查川省之兵與

雲貴官兵相距尚遠逆賊既守各隘會兵非易則

川貴官兵重在分勢夾攻而進勦全力惟藉滇兵

督臣鄂爾泰節制三省勢難親歷行間臣自顧才

雖謗劣而深受

國恩涓埃莫報犬馬之私實難自己況臣歷任雲南
二十餘載熟悉夷情若得身歷行間加以鄂爾泰
之指示臣仰仗

天威必能勦平逆獍以報

主知且夷性反覆不常善後尤關緊要臣亦可親歷其
地相度情形與督撫諸臣商酌布置務期一勞永
逸俾臣藉以仰報

殊恩於萬一倘蒙

俞允查臣已具摺恭請

陞見在先伏祈

聖恩准臣赴京跪請

聖訓面聆方畧再往雲南料理軍務則臣所有面陳之
事得以

上達并臣依戀之私亦得以稍伸矣臣無任惶悚待
命之至謹

奏

烏蒙事仰賴

上天默佑業已平復諸務俱經就緒爾殊屬多此一奏且
識見亦甚卑鄙

同日又

奏為遊棍招搖據實奏

聞仰乞

聖鑒事竊查粵東鹽政流弊甚多商疲竈困臣是以事

事

奏請

聖裁
逐漸清釐整頓近亦稍有就緒商竈人等無不感戴

皇仁急公承辦今年鹽足餉完毫無異議乃有江西遊棍皮應瑞者臣前聞其向曾作幕於本年正月內請其到署相幫及接見之下見其言論舉止膚浮輕躁聞其家眷現在廣城又現同刑部侍郎王朝

恩之家人在連州行鹽恐其出入關防不便隨即
婉辭伊即悻然別去九月間鹽道馮元方因公來
肇稟云有江西人皮應瑞近日在省甚屬招搖宣
言伊作一摺稿寄與舊東侍郎王朝恩代

奏請借庫銀三十萬與商人今王侍郎寄信來說已
經具

奏又聞伊向衆商云已蒙

皇上俞允以致各商聽信事事觀望等語臣一聞此言

不勝駭異即諭鹽道嚴飭各商上緊轉輸毋得聽其狂言愚騙去後忽於十月內該棍復又到肇拜臣云有說話臣因其現在招搖不便相會托言辭去繼因臬司黃文煒公事來肇臣面問其事據云寄摺代奏之事果聞其說臣因已經覆

奏王朝恩條議鹽政一摺未奉

聖諭不敢聲言豈意該棍以臣不令相會到處毀臣又見臣知而不問愈肆招搖且又揚言必再上摺等

語并將摺稿鈔錄令該棍商夥許紹祖交鹽道轉
送臣看臣思此等膽玩棍徒若不早為懲儆將來
必致有壞鹽政除將皮應瑞飭行地方官暫行嚴
加守候外事關宣露密摺臣不敢不據實奏

聞伏乞

皇上睿鑒施行謹

奏

此係棍徒中之尤者情狀甚屬可惡嚴拏審擬具奏以

聞

雍正九年二月二十一日廣東總督臣郝玉麟謹
奏為奏請

聖裁事竊查粵東地方山海交錯匪類最易出沒所在
村莊以及緊要之處無不設立墩臺撥兵戍守但
查向來修理營房墩臺等項責令附近居民料理
竝不動用公項雖設兵原以衛民在百姓修整營
房墩臺以為兵丁守望之所亦屬分所宜然但百

姓未免視為兵舍率多潦草塞責而兵丁又視為地方修整漫不經心粘補以致修整無休經時累月兵民每起爭端不能依限完竣況營房為兵丁棲止之地若不即時修整則有露處之虞而工料出自里民若地方官稍不留心胥役人等又有侵漁之弊是營房等項令民人修理實有未便臣伏觀我

皇上愛養兵民至周至渥且查山東等省修理墩臺等

項俱於存公銀兩動支辦理所有粵省營房等項可否仰邀

聖恩准於公用項下或雜款餘銀內動支分別衝僻蓋造瓦屋草房定以修葺年限則百姓無絲毫擾累兵丁咸得及時棲宿地方獲藉巡防之實效兵民永戴浩蕩之

皇恩矣臣因地方起見理合恭摺具

奏伏乞

皇上聖鑒施行謹

奏

公用銀兩原爲地方公務而設據奏如是兩益兵民何
靳而不爲耶汝等計議妥協酌量行之

雍正九年三月初九日廣東總督臣郝玉麟謹

奏爲海洋積盜悔罪投首

奏明安插事竊照廣州府屬香山新會地方有百峯
山及黃陽石橋等山袤延深密逼近海洋從前原

有匪類聚匿時出洋面擾害商民臣到任後業已
委弁將盜首李奕揚及陳大樂等先後擒獲俱經
奏明在案續又訪得尚有混名查面五即林兆榮者
原係李奕揚舊夥盤踞百峰山為匪黨渠魁臣即
諭令守備馮元設法搜捕務盡剪除今據馮元稟
稱奉諭帶領弁兵等入山搜探於本年正月二十
日據効力李德賀功加張武等帶領林兆榮暨夥
黨李亞壬葉永快李亞長林亞四黃亞二周成球

等七人前來稟稱情願投首効力贖罪等語隨據該備即押解到臣臣即親加研訊俱已取有確供緣林兆榮等係大盜李奕揚夥黨是以從前多方緝捕今既經投首似應照例免罪安插妥協查向來所有撫丁或一二百名或數十名曾經奉

旨分發直隸等省食糧入伍茲林兆榮等久匿山中路徑熟悉蹤跡稔知倘遇匪徒潛匿可用為嚮導以資緝捕且人數無多分撥約束亦不至有彼此勾

引之弊此臣愚昧之見可否留於本省派撥營伍
令其効力之處理合具摺奏請

睿裁伏乞

聖鑒謹

奏

既據奏稱可資緝捕林兆榮等准留督標効力行走

雍正九年八月初八日廣東總督革職留任臣郝

玉麟謹

奏為奏明酌設緝私巡丁以專責成以裕課稅事竊

照廣西一省鹽務雖額輕引少官運官銷易於辦理然亦須私鹽斂跡充斥無虞始於課稅有裨臣

查西省引鹽一由廣東省河轉運至梧州府上倉

一由廣東廉州府轉運至廣西江口中屯地方上

倉兩處水路臣已屢飭各該地方守口盤查人員

實力稽察近日一應運鹽船戶以及往來各項船

隻俱不敢夾帶影射惟廣東之高廉二府場地零

星綿延散漫竈曬走漏極多最難稽查又因界連
廣西私販悉由陸路挑載一路衝入廣西南寧一
帶蔓延思恩太平及賓州各屬一路衝入廣西鬱
林等州縣蔓延梧潯兩府各屬地方動輒百十成
羣逾山越嶺各州縣捕巡人役無幾莫敢堵擒臣
查此等私梟原屬烏合不難堵截總緣事無專責
以致橫行無忌臣現在飭行西省鹽道另募壯健
巡丁一百名擬於臣標專派外委千把二員前往

率領分為二路各於私鹽衝入去處駐劄晝夜巡查堵禦聽西省鹽道約束調遣并咨移西省轉飭各地方文武嚴飭汛守弁兵地方鄉練會同稽查倘遇私梟充斥協同巡鹽弁丁奮勇擒拏接應將所獲私鹽一半給賞一半充餉則私梟自可斂跡不獨官引易銷地方亦可藉以寧謐至於所募巡丁工食并千把盤費每年總於西省鹽餘內支用開銷無容動支正項臣因調劑鹽務地方起見事

關動支鹽餘差委標弁赴西省巡查理合具摺奏
聞伏乞

皇上睿鑒施行謹

奏

此乃因地制宜通融辦理事務在汝斟酌爲之如應達
部咨部存案

同日又

奏為酌劑廣西鹽務裕課便民仰乞

聖裁事竊查廣西引鹽經臣

奏請革去辦商名色專責各地方官辦理一應鹽斤
俱係該鹽道差委員役由廣東省河運至西省梧
州府以及廉州各場運至廣西江口上倉存貯聽
各地方官陸續領運行銷必得梧州江口倉鹽豐
足無缺方可源源配兌及時運銷則民食無誤課
亦易辦若遇雨水偶多場鹽少產或海運風信不
常廣東省河鹽少則梧州倉鹽不繼各地方官不

能及時領運不獨有誤民食因而課稅亦遲臣查
廣西向有秤頭餘鹽一項若行銷迅速每年可獲
餘羨銀一萬三四千兩不等名為鹽餘除每年提
解一萬兩歸入廣東京羨項下報解歸公外尚可
餘銀三四千兩以備鹽船遭風失水賠補之需經
臣於廣西撫臣金鉷請動鹽餘銀兩幫貼塘站工
食案內

奏明在案今查數年以來至雍正八年歲底止除一

切支用之外已積有一萬六百餘兩現在道庫實屬羨餘無事支用又係歷年湊積之項久久不無牽混臣請將此項銀兩飭行廣西鹽道在廣東省河以及廣州府於西省額引之外另買鹽二萬四千包運至梧州府并江口兩處上倉存貯凡遇西省引鹽遲缺之時即將此項存鹽及時配發行銷售俟引鹽運到即抵還存貯永為西省預備鹽斤附

入

奏銷即遇鹽道陞遷事故一體交代則西省無缺配之虞居民無淡食之慮稅課易辦官無重累

國計民生甚有裨益其一應鹽價運腳以及添蓋倉廩等費即於前項現存銀內支用經臣檄行廣西鹽道查議去後旋據覆稱實屬妥便可行但買鹽二萬四千包為數甚多挽運不易而現存之銀尚不敷用請每年買運八千包分作三年買足其不敷之銀總於雍正八年後鹽餘內添用等由到臣

事關預備鹽斤臣未敢擅便理合奏請

聖裁批示倘蒙

俞允臣當恭疏具

題為此謹

奏

似此裕課便民應行事宜何故不允具疏題請可也

雍正九年九月二十八日廣東總督革職留任臣

郝玉麟謹

奏為密拏逃盜事雍正九年九月二十六日臣因公
在省據廣州城守副將毛克明赴臣行署密稟本
日午刻有湖廣差官毛峻德到職衙門說稱奉湖
廣總督差拏行劫江西官署盜犯沈二前解至湖
廣孝感縣楊店地方脫逃奉

旨嚴拏今追緝來廣查有蹤跡懇請撥差官兵協拏執
有湖廣邁總督委令密拏印信牌文經職驗明合
行密稟等因臣隨諭該副將帶領弁兵親往協拏

務期弋獲嗣據毛克明稟稱逸盜沈二經地方文武官弁兵役同楚省差員人等追緝至桑園地面協力擒拏該犯竟敢持械拒捕衆人奮勇圍擒始得就縛并拏獲隨行王姓一犯又跟隨沈二之小子二鎖兒一名并行李衣服物件一併押交番禺縣收禁等語隨據該縣訊取各供詳報前來臣即批按察司再行確審供情嚴加肘鎖差委弁員多撥兵役協同楚省員役咨解湖廣督臣邁柱外理

合恭摺奏

聞謹

奏

緝獲要犯可嘉嚴行押解方不致有再逸之虞

雍正九年十月二十二日廣東總督革職留任臣

郝玉麟巡撫臣鄂彌達謹

奏為奏

聞事竊照粵東風俗輕悍民多愚頑臣等每於屬員因

公謁見諭令不時察訪毋使姦匪潛為不法詎有
饒平縣已革武舉余猊先因窩賊犯案經潮州府
通詳革完余猊仍於本年九月初二日夥同陳阿
幼等在海陽縣屬之歸仁都橫溪鄉託稱拜父母
會歃血結盟煽惑愚民以致聯界之揭陽縣河婆
地方居民驚恐逃避當經地方官曉諭各已安業
隨據海陽縣知縣張士璉訪聞經文武官弁陸續
拏獲余猊等一十三人訊據供認糾黨欲圖割害

官衙以洩私忿等因稟報前來臣等恐有別情適

潮州府知府胡恂因公在省即令其星馳回郡料理出示安慰一面行司轉飭究訊去後茲據該縣稟報隔別研訊始據各犯供係余猊為首令陳阿幼等糾合會盟方行招致即為發覺等語臣等查此等匪類散布流言煽惑愚民雖不足深信但事關歃血結盟此外有無通同匪類亦未可定若不親加嚴訊恐無辜者或有株累而姦徒或致漏網

隨會差官并遍示軍民人等如有首犯余猊挾讎
妄扳者槩行不究加意安撫以慰人心一面多撥
兵役將余猊等提至省城會同觀風整俗使暨布
按二司研審實情究明黨數另行請

旨外現今地方寧謐人民安堵理合據實先為奏
聞伏乞

皇上睿鑒謹

奏

凡遇此等事件萬不可疎懈馴至養姦遺患假若稍存姑息之念希圖苟且結案以爲能化大事作小事則誤矣但毋波累無辜爲要

雍正十年二月十二日廣東總督革職留任臣郝

玉麟謹

奏爲通核息銀數目酌議分給協營恭請

聖裁指示欽遵事竊照廣東兵丁仰沐

聖朝養

洪恩足糧足餉咸登衽席乃復蒙我
皇上垂念各兵吉凶之事不無所需

敕發帑銀賞給營運生息以濟其用除駐防八旗甲兵
外督撫提鎮各標又蒙

恩賞帑本銀一十萬兩實亘古未有之

曠典臣身膺全省之任自當悉行籌畫務祈均沾

天澤以垂永久查廣東通省綠旗額兵共七萬二千六
百零四名內督撫提鎮兵二萬五千八百零二名

又將軍標暨十四協三十五營寨共兵四萬六千八百零二名臣標原領帑本一萬八千兩借給鹽商每月每兩二分起息先自雍正七年十一月起至九年十二月底臣標共獲息銀并原存平餘共一萬三百四十餘兩前計息銀已經豐裕經臣具摺

奏明於雍正九年正月起開賞至本年十二月底共賞過各兵吉亥事銀一千六百一十四兩外存帑

本并餘利息銀共二萬六千七百三十兩零撫標
原領帑本六千兩據該中軍冊報自雍正七年十
一月起借給鹽商至九年十二月底共獲息銀并
原存平餘共三千四百九十兩自雍正九年正月
起至年底共賞過各兵吉凶事銀五百兩外存帑
本并餘利息銀共八千九百九十兩零提標原領
帑本一萬八千兩據該中軍冊報自雍正七年九
月起借給鹽商至九年七月得獲息銀共一萬一

千一百九十七兩自雍正七年十月開賞起至九年十二月底賞過各兵吉亥事銀七百三十八兩零又動支開張當舖錢店銀八千五百二十餘兩現存貯帑本并餘利息銀共一萬九千九百三十兩零左翼右翼碣石潮州高州瓊州南澳七鎮原共領過帑本五萬八千兩案據各鎮報稱或借給鹽商或開張當舖或置買田產營運生息之處或每兩二分或二分有零不等經臣據議

題報在案現今行查息銀實數統於造報到日彙核

外伏查臣標額兵四千五百零三名一年賞銀止
一千六百一十四兩撫標額兵一千四百三十名
一年賞銀止五百兩提標額兵四千三百九十七
名一年有餘賞銀止七百三十八兩據此臣通盤
核算即以臣標為之準則各協營俱照此一例核
算每年通省兵丁只共約需賞銀二萬五千七百
餘兩今督撫提鎮各標已現有帑本并餘剩息銀

共一十二萬二千一百七十兩零通以二分生息
計算每年已約可獲息銀二萬九千三百餘兩儘
將所獲息銀均勻散給則各兵已得均沐

恩賞不須再給帑本致年久或有侵那之弊臣愚見本
年各鎮所獲息銀除行令仿照臣等標兵賞數酌
量存留該鎮給賞之外悉於年底造具清冊定限
次年正月內同餘剩息銀解赴藩司衙門臣亦將
本標并撫提二標餘剩息銀一併湊入按照各協

營寨兵數之多寡均勻分給令該營將領收貯即
於雍正癸丑年開賞以濟各兵吉凶之用年底造
報臣衙門查考彙冊報部如此則事得畫一

皇上恩澤普垂久遠矣臣與撫臣鄂彌達再四籌畫意
見相同謹合詞繕摺奏請

聖裁如蒙

俞允容臣另疏具

題為此謹

奏

料理甚屬妥協候另有諭旨頒發

雍正十年二月十九日廣東總督革職留任臣郝

玉麟謹

奏為海疆關係緊要酌擬陞調之員恭懇

聖恩以裨地方營伍事竊照粵東濱臨大海水師員弁
較陸路尤為緊要茲有春江協副將陳顯患病不
能辦理營務經臣委員驗實現在

題報所有該協員缺係屬水陸專營副將必得熟識
水性辦事勇敢之員始克勝任查有南澳鎮屬澄
海協副將許大猷諳練水性船務辦事實心堪以
調補春江協副將其澄海協副將員缺查有大鵬
營叅將許國騰練習舟師馭兵有方堪以陞補澄
海協副將其大鵬營叅將員缺查有海安營遊擊
錢志漢吳川營遊擊蔡文昇俱係諳練水師勤幹
之員經前任督臣孔毓珣保送業蒙

恩准在案仰懇

皇上於此二員內

簡放一員陞補大鵬營叅將則各協營均收得人之效
矣臣因海疆地方關係緊要不揣冒昧據實

奏請可否陞調

洪恩出自

聖裁謹

奏

覽奏俱悉內惟錢志漢不似有膽量之人蔡文昇雖心
胸明白才具好頗欠誠實皆非朕所深取者今命爾赴
閩署理總督印務可傳旨與鄂彌達令伊於此二員中
檢選一員題補大鵬營叅將可也

雍正十年四月初六日廣東總督革職留任臣郝
玉麟謹

奏為

聖恩愈厚感激愈深恭摺

奏謝仰請

訓諭事竊臣一介庸愚荷蒙

皇上洪恩畀以廣東總督重任三載於茲涓埃莫報悚
惕之懷時深朝夕茲奉

恩綸命臣署理福建總督印務聞

命自天感激無地伏念閩省前距澎臺諸島後係三吳
門戶實為邊海要區臣以庸材恭膺

簡命惟有實心實力無欺無隱凡屬地方事務細加詳

察敬謹辦理但臣知識淺陋福建地方緊要仰求
皇上天恩俯賜訓示俾臣少抒犬馬之誠仰報

高深於萬一耳臣即於本月初六日起程赴閩外所有
臣感激下悃理合恭摺

奏謝伏乞

睿鑒謹

奏

但能勉法鄂爾泰之居心更有何可訓諭竭力為之莫

負朕之倚任

同日又

奏為奏

聞事竊臣庸陋下材膺受封疆重任今又荷蒙

聖恩著臣署理福建總督印務臣益兢兢惕勵敢不竭

盡駑駘力圖仰報前因臺灣土番不靖拒敵官兵

臣以閩省接壤緩急宜防檄令近界員弁留心探
訪併檄飭沿海鎮協各營多撥遊巡密加防範嗣

陸續據報兇番猖獗官兵屢被殺傷臺鎮總兵官

呂瑞麟於二月初六日遣岸裡後壠二社土官齎

帶元寶瑪瑙珠眉額綾襖等物前往招撫初七日

阿里史牛罵土番在犁頭莊截途殺死挑販數人

淡水路不通等由到臣臣探得兇番實無多人原

不足慮但聞臺地客民雜處每多作姦煽惑自應

懾以軍威速為殄滅安撫善良俾兇番咸知凜遵

國法若未經大振軍威使其畏威懷德遽行招撫苟

且完事似非奠安海疆之策臣查廈門距臺甚近
一切軍機事務便可料理臣今由漳州一路先到
廈門面詢提臣許良彬細訪一切情形事宜如兇
番已就擒縛臣即赴福州駐劄衙門辦事若兇番
尚在未靖臣即一面相機斟酌料理務期仰體

聖心悉心籌畫寧謐地方稍圖報效於萬一耳為此恭
摺

奏明伏乞

皇上睿鑒謹

奏

汝其酌量行之

雍正十年五月初七日署福建總督臣郝玉麟謹
奏為臺疆安帖情形仰祈

睿鑒事竊臣荷蒙

皇上命署福建總督印務於四月初六日自粵起程因
屢聞臺灣土番不法戕害官兵當經恭摺

奏明先赴廈門就近相機料理隨抵漳州府地方詢
問文武各員僉稱臺地尚在未靖臣即於四月二
十八日渡海到廈據提臣許良彬備言臺匪情事
竝云准陞任鎮臣王郡移請撥兵隨經檄調弁兵
赴臺策應署督臣阿爾賽亦檄撥兵二百名赴臺
應用又見廈門商民亦多驚惶并經酌撥兵丁分
行防範等語臣查土番原無足慮竊恐姦民乘間
煽惑致使地方不安必須嚴加防禦隨與提臣細

加籌畫酌撥陸路弁兵赴臺候調竝嚴飭水陸汛防加意巡緝茲於五月初四日接到提臣王郡致署督臣阿爾賽雙羽公文一角臣拆閱內開南路姦民一事起於鳳山縣濁水溪阿猴林等處三月二十九日賊到岡山汛與兵大殺三十日賊焚舊社四月初一日焚石井猴洞豎旗招匪旗寫大明等字樣初二初三攻打埤頭營盤燒燬萬丹巡檢衙署本職隨親帶弁兵赴舊社岡山等處率同弁

兵殺賊大敗守備張玉外委千總陳學聖外委把
總鄭光弘兵丁陳得添等八名奮勇陣亡本職於
初六日回府現在賊散民安擒獲首賊蕭田等便
宜正法餘孽正在搜捕惟吳福生一犯尚在懸賞
購緝土番各社俱已就撫止有大甲西首犯罪在
不宥分別辦理是北路勦撫頗有就緒南路小醜
撲滅已經蕩平并止署督臣阿爾賽所撥兵丁不
必過臺等語此皆

皇上恩威遠播姦匪就擒地方已獲寧謐臣隨致劄提

臣王郡務將未獲兇番姦匪料理妥協使海疆得以永靖至王郡既止署督臣阿爾賽所撥兵丁不必過臺臣與提臣所撥兵丁隨檄行緩發去訖臣又接臺灣府報文本年自春以來少有霖雨今四月初七八九等日府屬臺灣諸羅鳳山三縣時雨霑足早禾雜糧芒蔗咸皆茂盛民心歡悅彰化得雨情形現在飭查等語臣閱報文不勝為臺海兵

民欣幸仰沐

皇上洪福於無疆矣除南北兩路啟釁緣由容臣細查
諸案分別具

題外切念臺地被難民番亟宜撫綏安輯出征弁兵
亟宜犒勞陣亡帶傷弁兵尤宜優恤義民亦當獎
勵臣謹宣揚

聖恩現在逐一料理以示勸勉并行令臺灣府酌動庫
項一千兩分交提臣王郡鎮臣呂瑞麟以為行間

賞恤之用事竣開報會奪現在沿海一帶民人聞知臺地已經寧謐之信兼有多船裝載米糧赴內地糶賣廈門地方米價甚平人民安堵臣謹將准到提臣王郡知會臺灣安帖情形會同水師提臣許良彬恭摺合詞奏

聞伏乞

皇上睿鑒謹

奏

覽臺郡安帖情形朕懷深慰

雍正十年五月二十九日署福建總督臣郝玉麟

謹

奏為欽奉

上諭事本年四月十二日署督臣將軍阿爾賽任內准
兵部咨開雍正十年三月初十日內閣奉

上諭前降旨令將福建兵丁內簾牌手挑選五百名分
送京師及北直陝西山西三省以備教習之用昨據

總督劉世明奏報所挑牌手已於二月內令其起程等語朕思此挑選兵丁所遺額缺理應召募技勇精熟之人即行充補以實營伍著傳諭署總督郝玉麟等遵照辦理欽此臣於本年五月二十四日到臣福州駐劄衙門隨查此項挑選藤牌兵丁五百名所遺額缺前署督臣業經欽遵

上諭檄行各標鎮協營召募技勇精熟之人充補在案臣思此項挑選兵丁分送京師及北直陝西山西

三省乃係勤勞

王事遠出教習之人原籍各有家口未免內顧分心臣

仰體

皇上天恩現在熟籌安頓其家口俾遠出兵丁可以無

慮謹具摺奏

聞伏乞

睿鑒謹

奏

安頓藤牌兵丁家口之處前經阿爾賽議奏其屬妥協
已有旨矣可照行之

雍正十年閏五月二十四日署福建總督臣郝玉
麟謹

奏為彙報二麥已獲豐收早稻旋登大有據實奏
聞事竊臣奉

命到閩之日適值二麥收成之後已據各屬報稱十分
九分八分不等茲據布政司劉藩長彙報通省二

麥收成分數臣查今年泉漳二府種麥最廣其收
成十分者居多而八九分者間有一二處福興二
府福寧一州種麥亦多其收成十分九分八分者
各居其半若延建邵汀四府上遊之地宜於禾稻
種麥者少收成七八分不等臺灣海外不種二麥
然通省雨暘時若是以青黃不接之時米穀價平
民食充裕至現在之早稻秀實可觀臣到省連日
郊外勸農即據農人僉稱今年早稻茂盛倍於往

時今已將次收穫可望豐登臣隨查通省早稻情形據各屬所報亦與省城彷彿無異理合恭摺奏聞伏乞

皇上睿鑒謹

奏

覽二麥豐收並早稻茂盛情形不禁以手加額為閩民稱慶也

同日又

奏為海疆教化宜先頑民管轄宜近謹陳漳南地界情形酌議分駐改轄事竊臣粵東受

命署理福建總督印務訪聞福建漳泉地方多有巨姓自恃族大丁繁往往以強欺弱抗糧毆差械鬪匪犯種種不法官吏坐受處分鞭長莫及迨臣由粵入閩即從詔安平和等縣直至漳州府一路細加查問文武屬員僉稱惡習仍然未除復據漳州府稟稱平和縣南勝五寨坂仔洋頭等處大姓聚族

環居列處每因小事動輒黨衆列械互鬪殺人竟
同兒戲至南靖縣車田地方離縣甚遠俗悍民刁
遇事緝犯亦俱抗匿不出前經卑府審度風土情
形議將本府同知移駐南勝彈壓其南靖之車田
割歸漳浦縣管轄通詳在案等因到臣臣隨查漳
州府通詳原案內稱平和縣南勝地方離縣一百
五十里附近五寨洋頭坂仔琯溪山隔黃井翠微
三坪透龍等處民居稠密楊林胡賴葉陳張李蔡

黃諸姓環列聚居且墟場雜沓歷來逋糧械鬪毆
差匿犯事案疊積議撥漳州府同知分駐彈壓其
地又稱南靖縣車田地方共一十五保離縣一百
五十里東至漳浦縣城止一十五里其兇惡刁悍
無異平和南勝等鄉議將車田十五保之田園丁
口錢糧等項割歸漳浦縣就近管轄由司道會核
轉詳在案臣思欲整刁悍宜先化導查漳州府同
知無錢糧刑名之任惟有海防之責今分駐南勝

實居浦靖和詔四邑之中就近化導彈壓并理海防事務每於朔望宣講

上諭督率各耆民并家族房長朝夕訓誡涵濡歲月久
久自能移易甚為妥便至於車田地方丁糧田土
割歸漳浦縣就近管理尤為便利詢及司道咸稱
亟須變通除會同撫臣趙國麟恭疏具

題外所有酌議分駐改轄緣由理合具摺奏

聞伏乞

睿鑒謹

奏

覽奏將南靖所屬車田地方割歸漳浦并將同知移駐南勝彈壓等議俱屬合宜具題到日有旨但此同知務須得人方始有益當慎加選用為要

同日又

奏為恭懇

聖恩事雍正十年四月二十九日署督臣阿爾賽准兵

部咨開本年三月二十一日欽奉通飭營伍革除
空糧陋規諸弊

上諭一道當即欽遵移行各標鎮協營去後茲臣准水
師提臣許良彬咨開各標鎮協營每兵百名前經
會奏存留守糧三名以為修理軍械及營中公事
之用今伏讀

上諭有營伍公用無資定有額兵百名准抽二名之
諭旨今應否改為二名抑或仍照原

奏存留三名咨請示覆等因到臣臣查閩省邊海重
地各營公務繁多水師又有燂洗戰船等費前經
提臣石雲倬督臣高其倬提臣藍廷珍先後

奏請水陸各標鎮協營每兵百名存留守糧三名以
為整頓軍裝之用仰蒙

聖恩俞允欽遵在案臣自粵入閩一路觀看營伍盔甲
旗械名雖齊備但內中多有舊敝鎗械亦覺參差
不一亟宜修整以壯邊海軍容且年年操演鎗礮

製備火藥暨營伍一切公事所需均係公糧三名
內支用所有閩省現今存留公糧仰懇

皇上天恩應否賞照原存三名之數以濟修理軍裝等
用

洪恩出自

聖裁如蒙

俞允臣仍不時嚴行稽察務使核實辦理不得少有虛
冒俟軍裝鎗械整齊完日臣核定公糧名數另摺

請

旨遵行為此恭摺具

奏伏乞

皇上睿鑒施行謹

奏

此事與阿爾賽商酌定議行之

雍正十年六月二十日署福建總督臣郝玉麟謹
奏為奏明事竊臣抵福建署任後據臣標中軍副將

王振稟繳閏五月分馬兵六十分餉銀到臣據稱
此係總督衙門隨糧即在督標三營額兵名數之
內歷來按月呈繳以聽隨丁補入臣復詢問既係
馬糧馬匹現在何處據稱相沿止繳餉銀實無流
交馬匹細查竝無案卷不知起於何年等語臣當
將所交銀兩仍發王振收貯留為公用外伏查馬
糧六十分一年約有銀二千餘兩雖係向來督臣
衙門相傳舊例臣思從前未定養廉或留充為養

贍家口之用今已蒙

聖恩賞給養廉銀一萬六千兩之多一切用費實屬充裕此項馬糧即應隨時招補惟是招補必須連馬併發今既無馬又無馬價計此六十匹營馬需銀一千三百有零實無項可動既不便令官賠補更不便令兵自備臣再四思維查閩省邊海重地兵額不便虛曠雍正八年內經前任督臣劉世明題准臣標添設水師一營即於本標撥出陸兵七百

五十名外於水師提標并閩安協調出趕繒船四隻將原配兵丁共一百五十名即為新設水師教習仍支各原處糧餉原議臣標兵丁內如有缺出即令教習兵丁照依原糧頂補自設立迄今兩載以來十分之中頂補未滿一分以致提標閩安二處額兵懸曠日久至今尚有未補戰守兵糧一百三十七名臣愚昧之見將此六十分馬糧裁改戰守兵糧補足添設原額統歸水師營管轄則兵缺

不致虛曠哨巡亦免貽誤矣事關馬糧改步倘蒙

俞允臣照例具

題請

旨遵行但臣愚昧淺見是否可行恭候

聖主批示伏乞

睿鑒謹

奏

所奏嘉是覽之前劉世明到京朕觀其人甚不妥協尚

未料如此負心伊任內一切不及之處毋得代爲隱諱
悉行據實奏聞

同日又

奏爲奏

聞事竊照臺灣北路兇番糾衆復行猖獗據總兵呂瑞
麟請迅發內地水陸兵三千名前赴聽調經臣與
提臣許良彬署提臣阿爾賽檄調齊備并將番匪
情形及臣移咨提臣王郡親赴軍前調回總兵呂

瑞麟禦防府治各緣由逐一具

奏在案隨據軍前稟報拏獲逆犯元兇大武釐姦匪
溫賜等犯又據臺灣道倪象愷稟稱番逆漢姦乘
前撤兵之際復起邪謀欲稱番王煽惑各社觀望
效尤附近居民不獲安業兵民被害者甚多經訪
拏謠言惑衆假番放火殺人之林毓黃龍等杖斃
漸見寧貼有近山百姓田禾布野懼番擾害不敢
歸莊守備林元稟報沙轆等社兇番聚黨數百前

往中港地方擁搶港中生理船二隻殺死船上人
六七名燒燬南日營盤官兵放鎗打死兇番四名
餘番始散又准提臣許良彬咨開准臺灣道咨呈
諸羅縣莊民傅玉琳等稟縣水沙連社番酗酒意
要作歹請預為防範隨咨王提督撥兵馳防又據
臣差探稟報兇番聽得內地大兵將到踞沙轆地
方海防廳舊署為穴砍竹圍柵中起望樓不時執
旗遊巡等語臣查土番本無能為總因漢姦煽惑

指使效尤不法荼毒地方擾害良民罪大惡極今
據報官兵船隻即時各得順風開駕安渡重洋俱
已陸續到臺仰仗

皇上天威百姓得以安堵接提臣王郡來字云臺地夏
秋多有雨水九十月間進剿一鼓可得俟到行營
相機變通不敢拘滯現在先委叅將李蔭樾統領
大兵馳赴北路等語臣查臺地南北二路遼濶各
要隘處務期密行佈防使番逆無可逃竄隨劄囑

王郡并嚴飭臺灣道府遣撥兵壯衛護民人令各
歸莊收穫去訖再查臺灣道倪象愷人雖稍有才
具而性情偏執與衆不睦不便留於軍前臣一面
檄調該道即回府治料理地方事務一面會商撫
臣趙國麟暨布按二司詳加選委署淡水同知尹
士俟前赴北路軍營接辦一切事務著聽王郡指
示所有土番近日情形臣謹繕摺奏

聞伏乞

皇上睿鑒謹

奏

覽奏逆番情形知道了詳慎辦理毋忽

同日又

奏為奏請添設鳥鎗額數以資捍衛事竊查雍正六年六月內經兵部會議沿海省分每兵一千名設立鳥鎗四百桿續經前督臣高其倬於恭懇

聖恩等事案內酌議陸路各營兵丁器械每兵一千名

設立烏鎗五百桿水師大小趕繒船按照配兵名數酌添排鎗數目具疏

題請部議陸路每兵一千名設立烏鎗五百桿與定例數目不符水師船隻兵數器械視船之大小酌量配撥應如所請設立應用等因在案臣查閩省地方山海交錯水路則海面遼濶巡緝姦艘應須嚴謹陸路則山深林密人民獷悍尤資捍禦烏鎗一項水陸均屬利用臣前在廣東總督任內曾經

會疏

題請陸營每兵一千名應添鳥鎗一百桿共為五百
桿已蒙

俞允部覆准行所有閩省陸路各標鎮協營需用鳥鎗
相應仰懇

皇上天恩俯照粵省之例每兵一千名於定例鳥鎗四
百桿之外請添設鳥鎗一百桿共為五百桿於營
伍地方實有裨益臣案查前督臣高其倬兩次

題請陸路添設烏鎗之處部覆未允臣是以未敢冒昧會

題謹據實具

奏叩懇

聖恩批示遵行謹

奏

照此具疏題來朕降旨准行先即一面預為製造候部文到日遵奉按營添設可也

雍正十年七月二十六日署福建總督臣郝玉麟
謹

奏為調補臺澎之武職仰懇

聖恩准照舊例附支俸薪以資日用事竊照閩省臺灣
澎湖二處路隔重洋遠在海外從前凡由內地調
補臺澎武職雖未經接授新劄仍在原營附支俸
薪以資日用每年彙冊

奏報在案茲據福州城守副將馬名南稟稱有右軍

守備彭捷於雍正九年四月調補臺灣鎮右營守
備本年八月始行領劄在舊任附支過俸乾銀三
十八兩有奇右軍千總黃起龍於雍正九年正月
調補臺灣北路營千總本年八月始行領劄在舊
任附支過俸乾銀四十一兩有奇該備弁俱現在
臺地藩司因近今不准附支無可著追就近在卑
職營內七月分兵餉一併扣去還項現在措處散
給懇祈追還等語臣查閩省調補臺澎員弁因其

人材可用方行揀選任以海外要地若俟接授新
劄始支俸薪則周年半載之中該員所遺內地家
口養贍以及辦公日用均無所資未免有艱窘之
虞臣愚見除調補內地之武職仍照定例遵行外
其調補臺澎員弁可否仰懇

皇仁賞照舊例附支俸薪以濟日用俟接授新劄即於
新任起支其從前已經附支者免其追繳

洪恩出自

聖裁各員弁感激

天恩自當倍加奮勵益圖報效矣爲此謹

奏

此奏甚是候另旨諭部

同日又

奏爲遵

旨覆奏事本年七月二十三日准兵部寄到內閣大學

士臣鄂爾泰等欽奉

上諭據福州將軍阿爾賽奏稱臺灣地方甚屬緊要鎮臣呂瑞麟熟諳水務置之內地固爲勤慎之員而於臺鎮殊覺未便今可否將呂瑞麟調補金門鎮令李之棟仍回原任其臺灣總兵一缺臣查澎湖副將章隆持重幹練才堪肆應似可委署臺鎮印務再查福寧鎮臣馮吉品才具練達留心地方或以馮吉品調署臺鎮而以章隆署理福寧鎮務倘蒙俞允其章隆所遺澎湖副將員缺仍遵前旨令陳倫炯署理其興

化協副將員缺請敕令督臣遴選補授似於海疆有益等語爾等可將阿爾賽所奏密寄信與郝玉麟令其悉心斟酌若各員果能勝任著郝玉麟就近酌量於臺灣軍務就緒呂瑞麟可以更換之時宣朕諭旨應署理者署理應補授者補授令各員前赴新任一面奏聞倘郝玉麟另有所見或更有可用之人著速行奏聞請旨欽此欽遵臣查臺灣鎮呂瑞麟領兵進剿土番一案馭兵無術毫無籌度以致土番滋擾

地方百姓受害是以調回府治彈壓該鎮既已遺誤軍務應治以不職之罪但其尚諳水務可否革職留任調補金門鎮戴罪圖功

洪恩出自

聖裁至臺灣爲數省藩籬所關最爲緊要查署福寧鎮副將馮吉品雖辦理營務甚屬明白但於臺灣風土民情未經熟悉其餘各鎮亦俱不相宜至於章隆原係興化協調任澎湖副將已准部咨飭令赴

任乃延挨不往反行遶道來省明知軍務孔亟忽
云請假修墳如此居心行事之員似不便委署臺
鎮臣查有廣東碣石鎮總兵蘇明良巡察地方事
務最爲勤謹更能安輯兵民協和文武且才品兼
優曾任閩省漳浦營守備康熙六十年隨師進剿
臺匪著有勞績風土民情素所熟悉若以蘇明良
調補臺灣鎮總兵洵屬人地相宜臣謹遵

旨敬抒愚昧之見據實奏

聞再陳倫炯經臣奏請委署臺協副將奉有

俞旨其興化協副將員缺已經委員署理俟軍務事竣

容臣確核軍前實力辦事之員另行具

題請

旨以示鼓勵合并聲明統祈


皇上睿鑒施行謹

奏

覽奏知道了另有諭旨



硃批諭旨卷二百十四之四



總校官庶吉士臣侍朝

校對官編修臣馬啟泰

謄錄監生臣王永榮